

## MHA le ITLF Kimutuo



**N**ovember nisim 9, 2023 jingvai nidan 10:30 chun Lamka HQ Veng IB Office ah Ministry of Home Affairs, New Delhi a Joint Director IB (NE) Dr. Mandeep Singh Tuli le SoO Interlocuter AK Mishra chu ITLF in ana kimupi uve. Hiche kimutuona'a hin DC Dharun Kumar, Joint Director IB, Imphal Gnanasambandan le Asst. Dir. IB Lamka Soiminthang Thangsing ho zong ajao uve.

ITLF in mithi vuiding thu'ah MHA palaiho ana kihoupi in, mithi vuiliemna ding thu phat chomkhat set ana seikhom uve. ITLF in mithi vuina hi JPO khut'a ana piehlhahsa ahitah jeh in meeting masang in JPI lamkaiho ana kimupi masat in ahi. MHA palaiho toh thulhuhna siem ahitheilou jeh in hiche thu'a hi athahbeh'a kihouna anei kitdi'u ahi.

Delhi akuon'a hung khuolzin MHA lamkai teni vailhunna in ITLF in phuondum ana silpieh uvin ahi. Achiesa August nisim 8 nikhua'a New Delhi mun'a Union Home Minister Amit Shah toh ITLF lamkaiho kihoulimna thu chu velvetna ananei uve.

Thinglhang gamho'a Meilhei State Force umsahlou ding thu'a kihouna ana umsa velvetna anei uvin, ITLF in State Force ho thinglhang gam'a umthei lou ding ahiuve ti'a anasei hizong leh Amit Shah in state sung'a thillhung le thilsuoh zouse'a Center in thu aneilou ahijeh in hahsa lleh zong Meilhei State Force te amaho thu-thu'a chatloh lou ding, Central Force makaina le vetkolna nuoiya umdi'u ahi anati'n ahi. Hiche'a kithulhuhna chu tuchung Moreh thilsuoh'a chun zui bukim ahiloudan mudoh thei ahithu ITLF in MHA palaiho hetsahna anei uvin ahi. MHA apat hiche thilsuoh agelkhoh lleh'u ahidan aseu uvin, maban'a hiche tobang aum kit tahlouna ding'a MHA in pan alah zing ding ahida'n aseu uvin, Moreh mun'a Kuki-Zo Police officer khat mopuohna apieh ding ahida'n Dr. Mandeep Singh in aseiyee.

CBI le NIA te chalohdan thu'a lunglhailou thu le thinglhang le phaicham mi kikhah'a khenchuomna neitah'a natohna aumzing lunglhailou thu ITLF

in aseiyin, David Thiek lu kitan, Tonsingte nucha kihal, numei rape kibawl, saguohkeo'a mipi'n numei apuidoh'a azumsuo'u, MLA Vungzagin le a driver chule melsetah'a ganhing bawl'a kibawl'a khotuona beihiel'a eithana'u thuho zouse sang'a Meilhei numei le pasal kiholmona thu CBI/NIA in agelkhoh joh thu'a ITLF in hatah in lunglhailouna thu aseiyin ahi. MHA lam in mi zouse chung'a thutanna lhungchieh ding ahi'n, amasa zep le anunung zep umzong leh lhung thou-thou ding ahida'n aseivuin ahi. Hiche thu'a hin MHA in CBI/NIA in akingang thei lampen'a Kuki-Zo chate kithana thuho khuolchilna aneiding uva thupieh anei ding uvin zong aseive.

Imphal a suongkul tangho kilhadohna ding le transfer ding thu'a ITLF in tepna ana bawl dungjuiya government in mi phabep ahin lhadoh'u kipathu sei ahina ban'ah, tu'a suongkul'a tangdenho zong lhadoh ahilou leh transfer abawl nalai ding uvin tepna aneieye.

Imphal khopi sung'a Meilheite'n manchah tamtah alahdoh'u nungchomna thu'ah ITLF in government natohdan lunglhailouna thu aseiyin, MHA in hiche thu hi tuni changeiyin manchah nungholna atang hihlaiyin, nangho'n zong Lamka a nalahdohho'u nanung pieh ding'u ahi atiuvin, hiche thudawl'a hin ITLF lamkaiho'n phaisung'a nanung chom suohkei tieng'u leh keiho'a seikhamlou kiladoh chu kanung pieh chet ding'u ahi atiuve.

IDP te relief thu toh kisaiya government in itobang'a pan alah'em ti ITLF in adong in, Lamka DC in government panlahna ho aseiyin, chule maban'a panlah ding dan zong alhangpi khat aseiyin ahi. Helicopter service thu'a zong kihoulimna aum in, tua service umsa pen hapta khat'a khatvei bou service um hi nivei beh umseh ding, chule Kuki-Zo te khopi dang Kangpokpi, Moreh, le Lamka kikah'a zong helicopter service umding'a Amit Shah in anopna ana piehsa ahitoh kilhon'a hiche cheng zong tongdoh ding in ITLF in MHA palaiho hetsahna aneiyin ahi.

Political Talks dinmun zong AK Mishra hieng'a thudohna ITLF in aneiyin, ama'n aseina'ah SoO Talks 2005 a ana kipan chu tuni geiyin achiezom zing in, tuchan in SoO agreement toh kisaiyin in GoI nungtol lou in adingdet zing'e ati. Tuchung'a

boina akuon in SoO group in government hieng'ah Separate Administration definition seichienna ana nei uvin, demand zong piehlut in ana umta'n ahi. Tu tadi hin GoI akuon'a approval kingah tadi ahi ati. Political solution aumtheina ding in peaceful environment aum angaiyin, violence ahung um tieng leh political solution lampi asunohphahji'n, democratic tah'a political demand bawl jo ding in tepna abawl in ahi. Government in Manipur a Kuki-Zo te'n Separate Administration aneiding adeisah ahida'n aseizing pum in, solution aum ding tieng leh atokhah thei ding thil tamtah um ahi'n, hiche hochu aning-akah ima zouse chipchiltah'a vetliah ngai ahijeh'a phat kidezep ahi ti'n AK Mishra in aseiyin ahi. Government tahsan phot-phot uvin lang, SA thumna'a hin violence manglou in democratic means of protest habawljo uvin ti'n deisahna thu aseiyin ahi.

ITLF lamkaiho'n keiho'n peace ti-ti zong leng'un Meilheite'n muntin'a eitha uva ei-nokhum zing'u ahijeh in kaki defend tei'u ngai ahi'n, violence ahung umjina hi keiho jeh hilou in Meilheite jeh ahi'n, hiche jeh'a chu peace aum theina ding in solution amasat tei-tei angaiye ti'n aseivuin ahi.

## Aizawl a Zo United Meeting um

Achiesa November nisim 8 ni'n Zo United lamkaite'n Mizo Upa Pawl (MUP) toh meeting ana nei uvin, hiche kihouna'ah hin Zo United in MUP lamkaiho kom'ah kipathu aseivuin, frontline mess lha ijat hamkhat akithuopi ding uvin aseive.

Nilhah lam nidan 5 in Aizawl Club ah Zo United Executive memberho, SoO group ho, MLA le invitees phabep jaona'h thuchuom chuom ana seikhom uve.

November nisim 9 ni'n CYMA Office ah Mizoram NGO Coordination Committee toh ana kimutuo kit uvin, maban'a panlah ding dan thu ana seikhom kit uvin ahi.





## Tegnoupal Kithuopina

Achiesa November nisim 1 ni'a Zo United in Philanthropic organisationho'n Tegnoupal a um sopite kithuopina ding'a tepna ana bawl'u toh kilhon in Young Vaiphei Association (YVA) in Dk. 1,40,080, annchang Kg. 3120 ana dongkhom uvin; Young Paite Association (YPA) in Dk. 5,20,801, annchang bag 40, sangkhol-toka bag 48, thao bottle 60 ana dongdoh uve. Young Mizo Association (YMA) in Dk. 70,350; Kuki Khanglai Lawmpi (KKL) in annchang bag 200; Hmar Youth Association (HYA) in annchang bag 15, daal bag 5, thao tin 2 le chi bag 1; Mate Tribe Council in Dk. 20,000; Gangte Youth Organisation (GYO) in Dk. 40,000 le annchang bag 8; Zou Youth Organisation (ZYO) in annchang bag 69 le daal bag 1 ana pelut zou uve.

## IG AR toh Meeting

Achiesa November nisim 8 ni, nilhah lam nidan 7:30 chun 27 Sector, AR, Tuibuong ah IGAR General Rajan Sheravat in ITLF le CSO dang dangho ana kimupi in ahi. Hiche kimutuona'a chun Manipur a 'Cycle of Violence' ipiti suhbei'a um thei ding ham ti thupi mangcha'n kihoukhomna ana um'e. CSO chuom-chuom'a lamkaiho'n Manipur a boina abeina ding in CM Biren Singh haisah hihen lang, ami manchah Arambai Tenggol ho matdoh ding, chule phaituol'a AFSPA koiding in aseiyu.

Gen. Rajan Sheravat in violence haisan'a democratic tah'a demand bawljo ding in tepna aneiyin ahi. Moreh thilsuoh'a Meilhei commando ho chalohna thiemmo achan in, chule maban'a ama'n zong pan alah zing ding ahida'n aseiyu.

## Kithuopina hung lut

ITLF Relief & Medical Dept. khut'ah kithuopina munchuom chuom akuon in ahung lut zing nalaiyin ahi. November nisim 4 ni'n Lamka Second Hand Belt Traders ho akipat in annchang bag 40 ahung lut in, EAC akipat annchang bag 5, Parish Pastoral Council, Good Shepherd Parish, Lamka apat annchang bag 50, daal bag 30 le blanket 960 ahung lut'e.

November nisim 9 ni'n Dr. Ng Seanbawi & Family, Chiengkawnpang akuon in annchang bag 20 ahung lut in, EBC Head Quarter, Dorcas Hall, New Lamka akuon in annchang bag 100, daal bag 30 ahunglut'e.

November nisim 10 ni'n Pu Letkhogin IAS akuon in annchang bag 10 ahung lut'e. Amaho zouse chung'ah ITLF in kipathu ahin phuongdoh'e.

## Meilheite'n Sugnu bulu go

November nisim 10, 2023 jingkah lam nidan 7:20 akuon in Sugnu area sung'a um Leisan, G. Songgel, le Kanaanphai Arambai Tenggol ho'n bomb le mortar mangcha'n ahung galkap uvin ahi. Assam Rifles ho'n Arambai Tenggol ho ahung machal theilouna ding uvin ating uvin, alutbe theilou phat uvin ana nungjam tauve. Sugnu thilsuoh'a hin eiho lam'ah akitongkha aumpoi.

## Dharna chielha zing

ITLF Women Wing lamkaina nuoiya lunglhailou kiphinna hapta she'a ana umchu achielha zing nalaiyin ahi. Achiesa November nisim 9 ni'a kiphinna'a chun ITLF Women Wing akuon in Nu Manliankim le Julie Mawi lamkaina in kiphinna ana um in, Andhra Pradesh akuon'a hung khuolzin Pastor Madhukar le ateam ho zong ahung jao uvin ahi. May 3 a boina ahung kipatdoh akuon'a amaho houbung in eiho'a ding'a taona amazing'u ahida'n aseiyu, chule Relief Camp a homdoh ding blanket 700 val zong Relief Camp ho'ah ana homdoh uvin ahi. Tuchung'a ahung'u hi nivei ahungna'u ahita'n, Pathien bou tahsan'a, Jesu Christa a kingah lhah ding apoimo pen ahida'n aseiyu uvin ahi. Amaho hin puile'a hin kithuopi Thansang Guite in pao aledoh in, Dr. Pautinthang Chongloi in zong ahung khuolzinho ahin lhonpi'e.

Dr. Mari Ai, Assoc. Prof. Parish Priest, Tuibuong in tilkhouna thu aseiyin, chule hahsatna le thuohgimna hin Pathien mel eihin musah theidi'u ahida'n zong aseiyin, Nu Thiemnu in kikhenna taona amang in ahi.

Toumun kiphinna aum sung in Master Benhavi Gangte (9) in tumging tum in vahchoilaa asah in, Kanaan Veng unit thalheng in Ng. Nemzoupui in vahchoilaa asa'n, mipi asulip lseh lhon'e.



# COMING SOON

IN PHOTO MATTE PAPER QUALITY

₹599  
ONLY



## #MANIPUR MAYHEM KEY PLAYERS & EVENTS

A BOOK BY INDIGENOUS TRIBAL LEADERS' FORUM (ITLF)

### FEATURES

THE TRIBAL NARRATIVES - STORIES FROM VICTIMS - DAILY INCIDENT REPORTS  
ARTICLES FROM GUEST WRITERS - POEMS - STATISTICS - AND MANY MORE

UPDATED TILL 10 NOVEMBER 2023



**150**  
CONFIRMED DEATHS



**200**  
VILLAGES BURNED



**7000+**  
HOUSES BURNED



**360**  
CHURCHES BURNED



**41425**  
DISPLACED PERSONS



**204**  
RELIEF CAMPS

#### RELIEF SUPPORT

Office: ITLF Secretariat, Hiangtam Lamka

#### Contacts:

Mangcha Thangzom – 8837368373 (Convenor)

V. Gouthianmuan - 9862086583 (Co-Convenor)

#### FINANCIAL SUPPORT

#### ITLF Joint Bank Account:

Name: Henkhopao Haokip & N. Vialkhanthang

Account No: 41912626404

IFSC: SBIN0064016 | Bank: SBI Salbung Branch